

Inatsisartut inatsisaat nr. 19, 30. oktober 1992-meersumi, Inatsisartullu inatsisaanni nr. 23, 18. november 2019-mi allanngortinneqarsimasoq, siunertaavorlu sukkulaanut, allanullu sukkulaartalinnut (kakaaviunngitsoq), lakridsinut, allanullu lakridsitalinnut, marcipanit allaallu marcipanitallit, karamellit, milukaat, sukkuvaqqat il.il. sukkullit sukkoqanngitsullu § 1, imm. 1. nr. 2-miittunut akitsuutip peerneqarnissaa pillugu Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

Akissuteqaat

(Aningaasaqarnermut Akileraartarnermullu Naalakkersuisoq)

Siullermeenera

Akileraartarnermik aaqqissuusseqqinneq nunatsinni naligiinnginnermik annikillisitsisussaq inoqutiginnullu annikitsunik aningaasaqartunut ikiuutaasussaq Naalakkersuisut ilisimaneqartut akuerinikuaat. Akileraartarnermik akitsuusiisarnermillu aaqqissuusseqqinnermi ”Tamatta nunarput najoruminarnerulersitsigu” alloriarnermi siullermi nioqutissanik eqqussinermi akitsuutit arlallit atorunnaarsinnissaat appartinnissaallu pillugit inatsisissatut siunnersuut 2024-mi upernaakkut ataatsimiinnermi saqqummiunneqarpoq.

Isumaqatigiissut aaqqissuusseqqinnermi sammivinnik arlalinnik aamma imaqarpoq, tassunga ilanngullugit akitsuutit tamaasa nunatsinnut naleqqussarniarlugit ullutsinnullu naleqquttunngortinniarlugit misissoqqissaarneqarnissaat. Tamanna mamakujuttunut, sukkulaatinut il.il. akitsuutinut aamma atuuppoq. Naalakkersuisut taamaammat akitsuutinik allannguisinnaanermi akitsuutinik aaqqissuusseqqinnermi tamarmiisoq mianeralugu, tassalu akileraartarnermik akitsuusiisarnermillu aaqqissuusseqqinnermit immikkoortinnagu pinissaa aalajangiusimavaat.

Mamakujuttunut akitsuutini atuutereersuni nioqutissanut ataatsimoortunut akitsuusiinermi atuineq peqqissutsimi ilisimaneqartunik ajortunik kinguneqartillugu peqqissuseq aamma mianerineqarpoq.

Taamatut ataatsimut tunngaveqarluni **allannguutissatut siunnersuut** una saqqummiunneqarpoq:

Akileraartarnermik akitsuusiisarnermillu aaqqissuusseqqinneq ”Nunarput najoruminarnerulersitsigu” pillugu isumaqatigiissummi aaqqissuusseqqinnerup illernerit sisamaata ilaattut sukkulaatit sukkulaatiniillu nioqutissiat sulluunniit (kakaopi pinnagu), lakridsit lakridsiniillu nioqutissiat sulluunniit, marcipanit marcipaniniillu nioqutissiat sulluunniit, karamilit, bonbonit assigisaallu, aamma sukkunik akullit sukkunillu akoqanngitsut Inatsisartut inatsisaanni nr. 19, 30. oktober

1992-imeersumi, § 1, imm. 1 nr.2-mi taaneqartut nalilersornissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

Taamatut oqaaseqarlunga immikkoortoq Inatsisartunut suliassanngortippara.